



Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/MNP-81

KBC | THUSO

Kum 55 Ihinna

Tolbol/January 2018

So465



"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

WWW.KBC.ORG.IN

John. 17:11



Head office
 opp. DM College
 Imphal



www.kbc.org.in



kbcindia@rediffmail.com
mail@kbc.org.in



Pastor Jangkhothang Kipgen
 leh hinkhoa achenkhompi ding
 Miss Tingnu chu 11 Jan. 2017
 ni in Ankhumbung B/C a
 Rev. Thangkhosei Haokip
 Gambih No. 19 in Janggopna anitai

CONTENTS

THUMAKAI HO

1. Editorial/Christa lungput	1
2. Kumthahle lampi thah/Rev. D. Dounzel	4
3. Nalampi hou le Na thilbol hou/Pastor Onkho Haokip	6
4. Kipumkhat a kon kihuhdohna/Rev. Lamkeng Lhouvum	12
5. Kumthah le hinkho thah/Miss Lhingjanem Haokip	17
6. Mission Column	20
7. Men Column	25
5. Women Column	26
7. Christian Education Column	28
9. Report/Hetsah	29-31

EDITORIAL BOARD

Chairman	: Rev. Dr. HawIngam Haokip, President KBC
Editor	: Rev. Ngamjapao Haokip, General Secretary
Joint Editor	: Rev. Henjalen Dounzel
Contributing Editors	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
Cir. Manager	: Ms. Lhingjanem Haokip
Design & Layout	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



“Christa lungput neija kumthah 2018 lutding.”

Editorial

Text.Phil.2:5-7

Thumakai :

Hiche Kuki Baptist Convention Lhaseh “Thuso” ana la a lunglut taha anasim jing Houbung mithengte jouse leh mimal jouse nabon chaova chung a kangailut nao leh ka janao hiche Thuso mang chan Kumthah 2018 chibai kahin peove. Keija dinga jong tulha editorial column a thu kahin seina hi GS, kahina term alhin toh kilhonna achaina ahung hitan ahi.

Tunin Pathen lungset in kumthah 2018, i-hung lhung taovin, Christmas session jong ahung kichaitan, kumthah ahung hitoh kilhon in, in-sung, khosung, Houbung sung chule chate naote themjilna lam a admission ding lunggel jat chom2 a ikisah lel pan tah diuvin ka ging chan ahi. Ajeh chu kumthah ahung lhun teng leh angaija toh-gon thah lunggel thah kiti chu aum ding mong chu ahi. Hiche toh kilhon in anoija hin

point phabep ana kihoulim'u hiute.

1. Kumthah i-lhun toh kilhonna Lung thim thenna lungput neiding (1John.3:5)

Chunga Text kipe chu ana sim leo hen, "Christa Jesu a um'a hiche lungput chu nang ho sung'a jong neijun' atin, aban na isimsuh kit leh, "Pathen toh kikotten'a aum chu kolchah louvin, aki-neosah in mihem bangin akisem tan ahi," ti imu've. Paul ama tahin Pakai lungput aneijah'a Phillippi mite jong chu hiche lungput chu aneidiuva tilkhouna anei ahi. Chule I. John.3:5, chun, "Ama a chu chonset bei hel ahi," ati. Jesu lunggel chu atheng ahin, nulna umlou ahi. Hijeh a chu aman Juda upa ho jah a chu; koi hijongle numei jon lunga ve a chu ama nu chutoh alunga jonga ahi-tai, tia ana sei ahi.(Mt.5:28).

2. Kumthah ahito kilhon na mikho-to na lungput neiding,(Mt.14:13-21)

Jesun mipi agil kel'u chu amun, avetleh alung ase'uvn, nasatah in khotona aneitan ahi. Hijeh chun nga ni leh changlah pheng nga in mi sangnga (5000) chu ana vahva in ahi. Chukitle Nain kho a meithainu chapa athisa chu ana hin sah kit tan ahi,(LK.7:11-17). Eiho hi Christa nungjui tahsan chate ihiu toh kilhonna khotona lung put ineilou'u le lhinlelna nei ihi diu ahi, ti geldoh angaijin ahi. Malai non-Christian khanglai jengin jong ipu, ipa te hou'vin khosunga

meithai chaga ho chu khosung thakon na holeh House Tax ho jeng jong chu ana ve un ahivu. Hichu khotona lungput ananei jeh'u ahi.

3. Kumthahi-lut'utoh kilhonnangaid-amna lungput neiding ahi, (Lk.23:34).

Jesu Ama Pathen Chapa tah ahi jeng vangin athaneina mangcha louvin amelma ho jeng jong lethoh ding lungput neilou vin amaho ding joh in taona ana neijin ahi. Jesun Cross chung a akheh beh ho dingin hitihin anatao vin ahi, "Pah amahohi ngaidam in, ijeh inem itile amahon abol'u hi ahepouve", ati. Aman kineosah pum in thichan geija din ana thoh lhum keijin thingpel chan geijin ana kipedoh in ahi.

Achainan : *Sopite ho, tunia i-Pakai Jesu Christa lungput chu Mitheng Paul amatah in jong aneijin, hijeh a chu Philippi mite henga chu, nang hon jong na nei diu ahi tia ana tilkhou'u ahije ti kichen tah in akimun ahi. Ajeh chu lunggel thenglou mi chun, mi khoto na lungthim aneipon, khotona lungthim neilou ho chun imatih chan in mi sukhelna angaidam joupon ahi. Lunglut taha anasim ho jousea dingin Pathen in phat thei boh taken, Amen.*

Kumthah le

LAMPITHAH

Joshua 3:1-6

By: Rev.D.Doungel

SERMON

Introduction : Pathen in Israel te chu Egypt gam a pat na canan gam a dia ahinpui doh a a chena diu lampi chu amaho dia lampithah tumasanga anachekhah lounau lampi ahi. Hichu amaho dia lampi thah ahi. Hiche jeh a chu lamkah lah a amanthah louna diuva alamjot diu dan Pathen in phatah a aseipeh ahi. chutobang chun eiho jong 2018 kumthah hi imatih a jotkhah lounau lampi ahin hichu eiho dia lampithah ahi. Hijeh chun kumlhun kah a hinkho lampi ichenau va hi setna a imanthah pa louna dinguva itobanga lam ijot diu ham ti Israel te thusim a kon in kihil uhite.

A. Israel te lamjot ding dan:

1. Thingkong pu Levite nung khu najuidingu ahi (v.1-3). Isarel te chu gamthip noija alamjotdan u chu Pathen in phatah in ahi-masan ahi. Levi mite thingkong pu ho chun akipatdohuva thingkong chu aput phat phat u leh mipi ho jong chu aumnau mun cheh a kipatdohdiu amaho nung chu ajuidingu ahi.

2. Nangho leh nangho kisuthen-guvin (v.4-5). Israel te chu a kholjin u kipat masanga amaho le amaho kisutheng dingin Pa-then in aseipeh in ahi. Hichu alamjot nauva Pathen umpina le mapui a chantheina dingui ahi. Ajeh chu Pathen chu a theng lou toh umkhom theilou Pathen ahi. Hiche a melchih dia pha khat chu

Pathen in nahung duhtheng diu ahi atipon amavang nangho le nangho kisuthenguvun atijoh ahi. Hiche hin then na hinkho kiti hi Pathen in eihung suhtheng diu ahipon eiho joh ikisuh theng diu ahin hichu eiho mopoh na ahi ti asulang in ahi.

B. Christian ten kumthah lampi ijot ding dan u:

1. Eima le eima cheh kisuhtheng ding - Ipijeh a kisuh theng ngai ham? Ajeh chu “ Nakou pau athen bang in nangho jong thengun” tin Bible in eihil un ahi (1 Pet 1:15-16) Chrisian hinkho a suhtheng dia Pathen in a dei ho ju le khamnathei adang dang ho hi ahi (Lev 10:9). Eima cheh kisuthenglouva kumthah lampi hi ijot got uva ahileh Pathen in eikilhonpi lou ding u ahi. Aman eikilhonpilouva ahileh imasanguva chu accident to ding chu hetsa ahi. Hijeh chun kisutheng cheh u hitin kumthah man-guhite.

2. Se le pha hetna theng kipuisah ding (1 John 3:21). Mihem jousen se le pha hetna ineicheh un ahi. Hiche hi apha ahin hiche hi apha lou ahi ti hi koiman sei hih jong leh se pha hetna hin tanglouva aseijing ahi. Hiche

puihoina noiya hi hah jong leh hinkho imantheiyuva ahileh setna a vamang na ding aumpon ahi. Hiche se le pha hetna theng thua hi akinun louteng ilung in themmo eichan jin Pathen masanga lung ngam na aumtheijipon ahi.

3. Bible Pathen thu kipuisah ding (Ps 119:11,105). Pathen thu hi thuhing ahijeh in simding, hetding chule a thua nun ding ahi. Pathen thu toh kitoh a hinkho mang jousen bolkel aneilou ding ahi chule a chenalampia jong accident atolouding ahi. Ajeh chu muthim noiya thaomei akivah leh ichena ding lampi akimutheijin koima akipaljipon ahi. chutobanga chu Pathen thu kipuisah ho chu muthim noiya thaomei kivah a chetobang ahin, hiche a chu koima kipa louding ahi. Leng david in, “ Nangma douna a ka chonset louna ding kalung thim ah nathu kak-holjinge” atin ahi. Pathen thu hi chonset na a kon na eivengbit thei ahi. Hijeh a chu Pathen thu toh kitoh a hinkho manding, thil bolding chulle lamjot ding angaijin ahi. Pathen in hiche article sim a juiho jouse phatthei boh cheh ta hen.

NA LAMPIHOU LE NA THILBOLHOU KISEM PHAT UVIN Jeremiah 7:3 (cf Jeremiah 7-10)

Pastor Onkho Haokip

Sermon

Jeremiah 7:3

Thaneipen Pakai, Israel Pathen in hitin aseiyé, “Na lampi hou le na thil bol hou kisé phat uvin, chutileh keiman nangho hiche muna hi ka chen sah ding na hieuve.”

THUMAKAI

Josiah apat Zedekiah lengvaihom kikhah lah (640 -586 BC sung) chun Judah mite Pathen houdan chu mihem mit vet dinga Pathen jana le ngailutna neitah a kihouna abang jeng in ahinlah alungthim uvin vang Baal pathen, Ashtoreth pathen, Chemosh pathen le pathen chomchomho choiatna jeng bou anei tauvin ahi. Akam sung uva Jehovah Pathen ahou uvin ahinlah alungthim uva vang milim semthu pathen ahou tauvin ahi. Jerusalem khopia um ahiuva, Mose thusom achin uva, chule Abraham chilhah ahijeh uchun Pathen in achung uva thilse ahin lhut khum theilou ding in agel cheh uvin ahi. Ahinlah Pathen in Jeremiah kom a chun thu ape in, Jerusalem houin kot a ga dinga mi aphalhem nam mite henga thu sei ding in asol in ahi. Jeremiah in Pathen in aseidohsah bang in hangsan tah in Judah mite in alampihou le athilbolhou akisemphat dingun thumun li aseidoh in, hiche semphat dingho chu: (1). Pathen houdan dihlou/False worship (Jer. 7:1-8:3), (2). Themgao dihlou/False prophets (8:4-22), (3). Kisonna dihlou/ False confidence (9:1-26), le (4).Pathen dihlou / False gods (10:1-25).

I. PATHEN HOU DIHLOU (Jer. 7:1-8:3) Houin hinjon mipi chu atam mama jeng in ahinlah alunggil tah a Pathen mitmua Pathen dihtah ahou vang chu lhom mama dan ahi. A Pathen hou uchun

imacha aphachom ahinboldoh jou tapoi (Jer. 7:1-15). Jeremiah 7:11 dungjui in Pathen houin chu gucha michom in bang in asodoh tauvin ahi. Mipite chu Pathen houin a kisuhtheng tah

sang in Pathen houin suboh in apang gam tauvin ahi. Itobang in minthang henlang itobang in machal jongleh Pathen thenna sudai thei kihilna chu Pathen thu dih lou ahi. Ataonau chu imacha in aphachom tapoi (Jeremiah 7:16-20). Pathen chun Abraham chu Sodom le Gomorrah mite dinga tao ding in apha e (Gen. 18:23-33). Pathen in Isrealte ding a Mose taona chu ana ngaipheh in ahi (Ex. 32-33; Nu. 14). Ahinlah Jeremiah vang Judahte dinga tao ding in apha tapoi. (Jer. 7:16; 11:4; 14:11). Ajeh chu mihemte chonsetna chu sang val val jeng ahitan, thutanna bou chu amaho dinga kikoi ahitai (1 Cor. 11:30; 1 John 5:16). Jerusalem a cheng insung jouse chu milim houna lam a panla cheh anahitauvin ahi (Jer. 7:17-19). Akilhainau chu imacha aphachom tapoi (Jer. 7:21-26). Judah mite in kilhaina ijat in bol ujongleh alunggil u Pathen toh akinai kahse in akilhainau chu pamaisah ahibouve. Pathen chu bongchal tamtah le thaotwi tamtah jeh a lungdam ding ahipoi (Mic. 6:7). Hilchahna le suhdihna imacha in aphachom tapooi (Jer. 7:27-8:3). Hiche nam mite hin Pathen atahsan tapouve (Jer. 7:28). Hiti-hin a Pathen hou dan u adih

tapon, Pathen lungnatna le lunglhai louna ana chang gam tauvin ahi. Pathen hou dan adih lou tengleh ijat in kihou jongleh phachom lou ahin kismphat ngai ahi.

2

II. THEMGAO DIHLOU (Jer. 8:4-22). Pathen thu anahsah louhel uchu ngaitona dihlou ahi (Jer. 8:4-7). Mihem khat chu aluh tengleh akithou kit jie, mihem khat chun alampi akimansah leh lampi dihpai chu akiholdoh kit jie, ahinlah Judah mite in tonsot dinmun chung change imacha khohsahna anei pouvin ahi. Vanlailol a vakang le pelpalep jeng injong khohetna anei thei u ahi (Jer. 8:7) ahinlah mihemte, alungsung uva Pathen danthu kikoi le Pathen lim le mel a kismte in vang Pathen lam lam ahepha pouvin ahi. Pathen thu anahsah louhelnau chu kilheplahna aum jeh ahi (Jer. 8:8-12). Pathen lhacha bang a vahlea thu polea umho chun Judah gam sung asuchavai lhez jeng tauvin ahi. Amaho chu semthu thua thu pole a mipi atamjo lah a vahle le mipi jahnom nom seilea pang ahuiuin ahi (Jer. 5:12; 14:13-15; 27:9-9). Jeremiah chun hitobang miho hi joulhepna dimset louthem (Jer. 6:14), ahomkeu hui (Jer. 5:13), hunam le engset

san a kelngoiching (Jer. 23:1-4) ati. Amaho jal in khopi le gam-sunga chun natna tampi alang jeng in ahi (Jer. 23:25). Pathen in hitobang miho hi kou jong akou pon sol jong asol lou ahibouve (Jer. 23:25-28). Ahinlah lhagao lam kalsonna ding in lhagao lam lamkaiho jui angaina aumin ahi. Hou natongho Government Office kai umleh ipi isei ding uvem? Hiche bang chun Hou kiloikhomna a hou natong lou khat ahilouleh tahsa lam lamkai khat in vai hin homleh ahilouleh KBC Office a natong khat ga hil lele jingkei leh datmah umtah hi ding ahi. Dih jong dihi thei lou ding dol mong ahin, natna le chehchaona umna dinga lampi umdoh ding ahi. Absalom thi nikho in Joab in thupo ding mi khat asol in, ahinlah michom khat ama le ama akipatdoh in akisolpa sang in alhai hat jo nan, ahin David angung alhun in sei ding helouvin aumin ahi. Hat man le nei man a Pathen natoh thei ahipon, Pathen natoh man a hat lou ding tina jong ahipoi. Mi sanga ihat jeh a Pakai ang sunga sei ding inei louleh na kitong chu panna bei ahi. Ipi chu hileh thu hil le themgao lhem hilouna dinga kichih thei ding ahi. Pathen thu anahsah lounau chun thupi tanna alhut dingu ahi (Jer. 8:13-22). Pathen chun

loujao le honlei jouse chu asuh-set ding ahitai (Jer. 8:13, 17). Pathen chun khopi chu ahin suh-set ding ahitai (Jer. 8:17). Pathen chun mipite chu asuhmang ahilouleh galhing a akai mangsah ding ahi (Jer. 8:19). Hiche thilsoh jouse chu amaho dinga thina gutwi kidon tobang hid-ing ahi. Themgao dihlouho in mipi apuichatvai uva anung gu hung lhung chu Jeremiah in ana pona lleh jeng in ahi. Themgao lhemho in mipite chu lhamonna dihlou, tilkhouna dihlou le lou le ai dihlouvin ana jen uvin, achaina in jen dammo hel in aumtauvin ahi. Themgao lhemho kivaipai jeh a Judah gam a chehchaona anal hung chu Jeremiah ngoh loi jong um inte. Pathen nganse lou pou pou in na atoh tengleh anung gu um ji ahi. Mipi in anung gu athoh chu achom ahin, Pathen in hiche jeh a eima chungu phu ahinlah ding chu tijat umpen ahi. Pathen umlou hihen thupi tanna umlou hileh bol thei jouse bolmo ahipoi, ahinlah Pathen in thutanna eipuilut dingu ahijeh in ibol nom jouse, isei nom jouse le ichana nom jouse akibol theipoi. Themgao lhem jeh a gam sung le khopi sung natna hi jen dam hahsa tah ahi. lgam sung uva atam lleh jeng tan ahi.

III. KISONNA DIHLOU (Jer. 9:1-

26). Vannoi leiset nam tamtah lah a Pathen in kitepna asempi (MoU) hi Israel mite bou seh ahive (Gen. 12:1-3). Pathen nam lhen chule cheptan a melchihna kibol (Gen. 17) ahiutoh lhon in Pakai angunga nam deilhen chang jing ahive (Ex. 19:1-4). Vangset umtah in Israel mite in Kitepna le Chondanho jouse Pakai angunga them achanpi ding uvin ana tahsan uvin ahi. Amaho gel in tahsan jong angaipon, kisihi jong angaipoi. Hiche kisihi le tahsan kitihi chidang namdangte ding bouvin agel uvin ahi. Abraham son hijeh a kisonna, "keiho Abraham son ka hieve," hi Baptist John (Mat. 3:7-9), Jesu (Jn. 8:33ff), le Paul (Rom. 2-3) injong ana kimaitopi cheh uvin ahi. Pathen nam lhen hijeh a chonset ngaidamna ding aumpoi (Jer. 9:1-6). Jesu (Lk. 19:41) le Paul (Rom. 9:1-5) bang in Jeremiah jong amite lhagao hinkho pohnat jeh in ana kap jeng in ahi. Jeremiah chun amite chonsetnaho-thenlouna, milim houna, kijoulhepna le ijakai jeh in alungthim a akap kap jeng in ahi. Judah mite chun Pathen nam lhen ahijeh uchun chonset bol thei ding in akigel uvin ahi (cf. Rom. 6:1-2). Pathen nam deilhen mi hivang in thutanna aki ongthol dehpon ahi (Jer. 9:7-16). "Helouva

voh dol a thilbol chu kivo lhoming ahi. Tamtah kipe henga chu tamtah kibeng ding ahi, koi hile tamtah avopsah uva kon a chu tamtah angeh dingu ah." (Luke 12:48). Pathen in Isrealte koma chun, "Leiset chung mihem insung hijat lah a nangho bou ka het nahiuvin, ka het jeh uva na themmona jouseu chungatalen ka peh tei tei ding nauve," atin ahi (Amos 3:2). Hiche thutanna chun khopi chu asuhchim ding, gamsate chenna soh doh ding, lou phalai jouse chu gamthip gam kiso doh ding ahitai. Ajeh chu Judah mite in Pathen thu anahsah pouvin, chonset abol uvin Pathen in avenbit jing ding un akisong uvin ahi. Pathen nam lhen hivanga lhagao lam dinmun kihetthemna um ahipoi (Jer. 9:17-26). Koimacha imacha jeh in kisona hen, ahinlah Pakai ahet jeh in kisong hen (Jer. 9:23). Akisong a chu Pakaiya kisong hen (2 Cor. 10:17). Themzilna, haosatna le thaneina ijat um jongleh Pathen a kon phattheina toh kikot thei khatcha aumpoi. Pathen in gamsunga kitha kimat hihen, thu le la jat chomchomho akipapi poi, aman akipapi chu Pathen thua nunga, Pathen hetna anei jeh a Pakaiya kison ding chu ahi. Judahte chu tahsa cheptan in akisong uvin lhagao lungchang chep akitan

pouvin ahi (Deu. 10:16; Rom. 2:25-29). Tahsa lam dol a kisonna ding imacha aumpoi, akisong a chu Pathen a kisong ding ahi. IV. PATHEN DIHLOU (Jer. 10:1-25). Abraham in Pathen dihtah ahou masang chun milim semthu ana houvin ahi (Jos. 24:2-3). Israel mite Egypt gam a asohchan lai uchun milim semthu Pathen tamtah toh ana kisuto jing uvin hiche milim semthu pathenhou chu Israel mite in gamthip gam ahin jot lai uchun alungsung uva acheng den in, Aaron injong bongnou lim in pathen khat ana sem in ahi (Ex. 32). Sinai mol achun Thusom jong ahinlauvin chule Pathen loupina jong ahinmu uvin ahi. Hiche Pathen loupina chu bonglim in ahin khel doh kit uvin ahi (Ps. 106:20). Milim semthu pathen hou kiti chu alungsung uva acheng den den in ahi. Jeremiah in akimvel a milim semthuhou ataimo in ahi (Jer. 10:1-16). Mose in Pathen dihtah ahouna ding uva thupeh le thuhil anei jing jeng vang in (Deu. 7:1-11), amahon milim semthu pathen houna lam a alungthim u ape jing uvin ahi. Hiche pathen lim semthuhou chu imacha phatchomna neilou jeng ahiuvin lou lai a vachate kichat thei dinga kilah lim semthu bep ahiuve (Jer. 10:5). Hiche pathenhou chu apao thei pouvin, lam

ajot thei pouvin, mihem in apoh lele ding bou ahi (Ps. 115). Lim semthu hou kiti hi thil sempa hilouva thilsem khat kihou ahi (Rom. 1:25). Hiche milimho chu kho helou ahiuvin ahi (Jer. 10:8). Ipi hileh Pathen sanga chungnungjoa kinei nei le gou chule igel thupipen mihem hihen ipi hileh hicheho jouse chu eima dinga milim semthu pathen ahiuvin ahi. Milim semthu houna akon ontholna theipen chu – Pathen dihtah, Pathen hing jing, Pathen, Hatchungnung Pathen henga kile a ama hou chu ahi. Jeremiah in ahunglung ding aven thutanna hung ding jeh in akap in ahi (Jer. 10:17-22). Jeremiah chun Babylon mite in Judah gam ahin delvuh uva thilse tamtah soh ding jouse amuchen tan ahi. Themgao chun Babylon-te hung tengleh in kihalvam dingho, nu le cha kikhen dingho, galhing a kikai mang dingho abonchan ase in akachampi in ahi. Nam pumpi chu a lamkaihou phat lou jeh in galhing in akikai mang tauvin ahi. Jeremiah chun chung lam aven Pathen lungset thum in ataove (Jer. 10:23-25). Pathen chun Jeremiah koma chun amite dinga tao lou ding in ana sei masa in ahi (Jer. 7:16). Amite dinga atao lou vang in ama chu mopo khat hina in ataovin, amite thohna-

ho jouse ama in athoh in ahi (Jer. 10:19). Pathen in mihemte chonna bang banga alethuh leh hing joulou dingu ahin mangthah jeng ding u ahi (Jer. 10:24). Psalms 103:10 chun, "eiho chonset bang in Aman eibol pouvin isetna bang uvin Aman talen eipepouve," ati. Ezra 9:13 chun, "Pathen in isetnau sang a nemjo in talen eipeuve," ati. Jeremiah in hichan hin Houin keltot phunga a Semon ajou tan ahi. Themgao le thempu chule lamkaiho chu Jeremiah thusei, thudih thutah chule Pathen dihtah thu chu pom tah sang in ama chu tha ding in apedoh tauvin ahi. Tulai Pathen thuseihon ichan gei a hangsan tah a thu kisei ngam ding hitam? Tulai mipite in Pathen thuseihon thu aseihou hi akipom cheh thei in, Pathen nganse louho thusei aki nophat thei ta dem? Pathen in Jeremiah chu lhacha natoh nomtah apepoi, ahinlah Pathen invang asuhat jing in ahi (Jer. 1:7-8, 17-19). Pakai ngah jingho chun athau asemthah jiuvin ahi (Is. 40:31). Pathen dihtah neiho chu kihe mama inte, mihem mu ding hilouvin Pathen mu ding in hinkho mang uvinte. Thuchaina Kum thah imang jing uvin ahinlah kum thah hi na nei jing lou ding ahin khat veileh kum

thah na mu lou ding ahi. Hiche kum thah hi Pathen in na hinpeh ahin Gift lenpen chu ahi. Hiche kum thah sunga hi ipi na bol ding ham? Kum tam jeh a kikhelna lhung ahapon, kismphat jal a bou kikhelna lhung ji ahi. Pathen thun vang NA LAMPIHOU LE NA THILBOLHOU KISEM PHAT UVIN atin ahi. Igam sung ule ihoubung sung uva PATHEN HOU DIHLOU (Jer. 7:1-8:3) aum tah jeh in Pathen hou dan dihtah ihina ding un pangkhom cheh ute. THEMGAO DIHLOU (Jer. 8:4-22) aum tah jeh in Pathen loupina thei le Lenggam machalna ding in Pathen thua kibulphu utin, alhemho pailhaute. KISONNA DIHLOU (Jer. 9:1-26) aum jeh in eima hina a kisong louvin Pathen a kisong cheh ute. PATHEN DIHLOU (Jer. 10:1-25) aum jeh in eima le Pathen kikhah a thil thupijo jouse mang taken! Eihon I- Pathen houdan u kisuh dih utin, Pathen thu ahiding bang in mang cha utin, Sumlepai le ulenao, tulebe, phung le chang chule hina jeh a kisonna hilouvin Pakaiya kisong utin chule Pathen le eima kikhah a khohsahjo pathen dihlou jouse pailha a Pathen dihtah toh kilhon khom jing utin Ilampihou le ithilbolhou kismphat taute.

Kipumkhat a kona KIHUHDONNA



Rev.Lamkeng Lhouvum

Sermon

“Hichun Mose’n maicham khat asemin, Hiche maicham chu amin Pakai chu kaponlap ahi” tin asah in ahi.

ljeh inem iti le aman aseiyin

“Pakai laltouna chung pang khut chun gal asat ahi-bouve, Amelek douna Pakaiyin akhang khanga gal abol ding ahi” tin aseitai

(Exodus. 17: 16)

Thumakai:

Amalek mite chu Israel te dou dingin ahung kon taovin ahi. Hichun Mose in Joshua chu Galsat lamkai dingin aseitan, Bible a Joshua min kiphahna masapen jong ahi. Joshua kom’a sepay ho gong-toh in in galsat din kon tan, keima Molsang chung a kaltouving tin hiche mun’a chu kaga din ding ahi. Hiche thilsah a konin khut li (Four hands) umdol seiju hite.

1. Khut kidomsang.

Khut domsang: vs. 11 Mose chun akhut adomsangin ahi. Keima molchunga kadinna kakhut kadopsang ding ahi. Keima kadin ding ding ati hin, kiging jinga umna (alertness) avetsah ahi. Ama chu nomtah'a touva kicholdo ahipoi. Keima Pathen angunga chu kadin ding ding ahi. Hichu amasapen ahi. Mose adin hin lamkai khat hina a ajamang leh aihmu lamkai ahi lou leh amopohna geldao/ gelneo lamkai ahipoi.

2. Lhang chungga dingin kate ati. Ipi dinga Lhang chungga dingin kate ati ham? Imu adih thei nading. Galkisat ho a muthei nading ahi. Thil mu thei na din asang jep jep ngaiya ahi. Pathen na kona thil muthei nadin asnang jep angaijin ahi. Mol chungga chu kadin ding ahi. Mose chun keima Ponbuh a tao nah in mang inge, ati thei ahi. Hin lah Mol chung sangpena chu kadin ding ahi ati. Hiche hin ipi avetsah ham? Hiche hin Mose thilmuna (Vision) aseidoh nom ahi. Sepay ho chu phaicham'a gal kisat ahin, Molchunga adin ti hin, imajouse Velhi jing (Watchman) ahina avetsah ahi. Gal kisatlaiya Molsang chungga kon'a velhi jing ho chun, mel-

mate chu hoilanga kona hung kon hiuvem? Ti ho mudoh tei na ding avetlhit jiu ahi. Hijeh'a chu Mose' n Molsang chung a chu kadin ding ahi. Tunia ei ho jong Pakai kelngoi te vesui dinga (Watchman) ding'a kou nahi leh nangma Vision ipiham ti kikhol phat ahitai.

Thumna: Mose chun keiman Pakai tenggol chu kadop jing ding ahi. Hiche Pathen tenggol hin, Thaneina avetsah e. Hiche tenggol chun Pharaoh leh aloite ho akimaitopi ahitai. Hiche tenggol chu ahi Tuipi san kehni so a Israel te galkaisah a chu.

Katenggol chu kalkhutna choi jinge, ati. Nakhutna ipi nachoi ham? Jesu'n thilbol theina bapeh ahi. Thisana lhatsa nahi leh thil bol theina napeh ding ahi. Nangma apenthah na nahia Jesu toh na natoh khom leh Thaneina na nei ding ahi. Tunia hi thanei tah'a Pakai toh natoh khom phat ahitai. Phat tamjo ei ho Houin jon mai mai Christian ihijiuvin ahi. Akothuhlai laidoh dinga ikigonu ngai ahi. Mose chu keima Thaneina chu kakhutna katuh jinge ati. Hiche kelngoichingpa tenggol chu Pathen in akikhelsah in Thaneitah ahitai. Pakai Jesun van'a leh leiya Thaneina chu keima ei

kipe ahitai ati. Hijeh a chu Jesu Christa min'a gal isat diu ahidan hi thil khoh tah ahi.

Pakai min'a thaneina ichan pa chu iman diu ahi. Abang leh Houn ina ikaiju hi phajenga igellu ahin, Lhagao galsat na tah tah chu ibollouvu ahi. Hijeh chun sopi ho Pakaijin nalhatsah ahileh Pakaijin vangam kaid-ing bepma eilhat dohu ahipoi. Hiche leiset chung'a thil akidang dang boldoh dinga lhat doh nahi.

I. Timothy 2:8-9.

Timothy kom'a chun Khuttheng domsangan ati. Khut dop mai mai hilouvin, Khut theng domsangan ati. Hinkho leh chonchan theng tah'a Pakai anga khut theng dopsang ding hi ngai-chat pen ahi. Khut theng chun ama hinkho athen na ding ati ahi. Paul in nakhut domsangan, atin Mose akhut theng chu adom sangin ahi. Atheng lou hin kho hin, mi Pakai lam'a imacha aphot chom sah theipoi. Nahinkho hi athen angaijin ahi. Tunia nakhut chu itobang khut ham? Nakhut chu thisan kiso na khut, Nehguh chahguhna khut ahi leh Pakai keingoinou thisan na chu nasop theng thei ahi. Tunia nakhut, nalungthim leh na lungel (mind) ho jouse athen ding Pakaijin adeiye. Nikhat

leh chamkim na mun chu ilhun diu ahi. Paul chun abimun chu hadel'a kadel ahi. Masang lam lhuna dinga chu hadel'a kadel ahi. Hitia iche jing laijuva hi tunia Van lam sanga khut theng chu domsanga Pakai lam jona che jing chu ihu hinam?

2. Mose khut chu agihtai.

Vs 12.

Khut chu akidomsang keo hilouvin, agih tan ahi. Ipi dinga Mose khut chu hung gih'a ham? Ginchat umkhat chu akhut chu Minute 10, 30 adop laiyn atha acholpoi. Hinlah, pung khat ham ham chu adop leh Atha hungchol, athan hung ngoi ahitai. Hijeh chun Bible in Mose khut agih in atha acholtai. Hijeh chun akhut ahung nem phat phat leh Gal chu alal jiuvin ahi. Hijeh chunk hut chu akidop lou leh gal chu alal jiuvin ahi.

Nangma jong napen thah laiya Pakaiya nakipana chu tua hoiya um hitam? Penthahna kaneije, kei michonse kahi nati na chu hoiya um hitam? Pakaiya kipah tah'a vahchoila nasah lai, Testimony nasei lai nikho chu hoil-aiya uma hitam? Atao jing nahia nataona nom nasah laichu hoiya um'a hitam? Christa toh lam jotkhom ihilai chu sang cheh cheh nom cheh cheh ding ahi. Hin lah phat khat khat leh Pakai natoh

thachol um kisa ahi. Nahin kho hi nom tah'a Pakai toh kivopjing nahi ham? ahi lou leh thachol'a um nahi ham? Kipenthah da hen nop nop'a kium leh nati kit nom ham? Tunia nahin kho hi ve le chun Mose atha achol phatna olcha cha akhut alhah-suh suh banga chu nahin kho, na testimony ho jong lhasuh jep jep ham? Ahilouleh Pakai natoh na a chu nakipa jing nalai ham? Hiche hi aum lou leh sopite Pakai natoh hi nalel ma ma hiding ahi. Pakai natoh hi agih mong monge nati ding ahi.

Pakai anga inatoh nao tuicheh cheh ding dol ahi. Lasempan, Ama kin kabolchanin, Atuina akhang khange, ati. (The longer I serve Him, The sweeter it grown). Tunin van noi leiset muntin ivet leh khut tampi akidom nem gamtai. Vanchung lam'a khut domsang a um gam tapoi. Sopite, nakhut chu nadopsang jing hinam? Psalm. 100:2 chun "Kipah tah in akin bollun" atin ahi. Houbung chun nangma nakikhelsah ding hi louvin, nang joh in Houbung nakikhelsah ding ahi.

3. Kithokhomna khut (Helpful hand)

Mose chu achangseh in ading joutapoi ti chu Aaron leh Hur in ahe lhotan ahi. Amani ahung

lhonin Mose khut chu adom sang lhonin ahi. (Helpful hand.) Lamkai khat in ama atha achol teng leh aban tha chol dom ding akithopi ding mi anei angaijin ahi. John Baptist chun "Keima kanem suh cheh cheh ding, Ama khang tou cheh cheh ding ahi". Jesu Christa leh Paul te ho jong atong bom (Team) aneijun ahi. Kithopi thei ding panpi thei ding khut ngaichat ahi. Nakithopi ding nadomsang ding Aaron nanei hinam? Galjona dinga chu Mose bep chu ajo lou ding ahi. Misei jui them ho bou chu lamkai them ahin, misei jong ngailou ama lamkai phatah ding vang koima lamkai dih tah ding aumpoi.

Pathen khut kiti hi adomsang khut ahi. Pathen in nadopsang lou leh nang le nang nakidopsang jong le chun phachom lou ding ahi. Ei le ei kidomsang ihileh ilhah mang na jong sang ding ahi. Pathen in nadopsanga ahileh adompa khut chu navet jing ding ahi. Nang leh nang nakidop leh Pakai doumi nahi ding nahet angaijin ahi. Mum-bai ya natong khat in company a natong ho thu aseina a, "Dopsang thei lou Graduate atam vallin, company thil deicha mai mai leh anatohna Absent jing atame" ati. Pakai dop thei lou

nahileh Satanin nang naop tina ahi. Pakai khut ahilouleh satan khut in nadop ahi. Tu a hi ipi khut pen penin nadop ham? ven. Koi khut chun nahinkho atu jing ham ven?

Tulai khangthah khopi ho a amngin ahi. Pakai lhacha Pastor ho bou ngse ding ham ? ahipoi, kitho khom ding ahi. Muslim ho jingkah matah taona khun muntina mi ho asu khangun ahi. Hetdoh thei thil ni (2) chu: 1. Hichun eikai thou jie, Pakai neikithopin, ka jing ihmud nalou din, Lamkai kahin a a ka ihmud den louna din nei kai thouvin tiu hite. Missionary ho lolhinsah in tia taopeh angaije. 2. Tunia lamkai ho jingkah pung nga 5.00am a ikitho jiu hinam? Bible study ineijui hinam? Kitho khom na khut chu Aaron leh Hur in anei lhonin ahi.

Alang khatna igelleh Mose khut angoi Aaron leh Hur in langkhat cheh adopma akithokhom banguva hi kithokhom ding ihuvin ahi. Rev Thangsat Kigen KBC General Secretary ahilaijin " Miho hin kato adop u ham kati leh Kato asutthodanu ahi" anatin ahi. Kithokhom kidopto kiti hi Christian te nuchan le khanchan ahijonahi.

4. Galjona khut vs 13-16.

Mose khut changseh ahitapoi. Pathen in khut kithokhom ho le Joshua amangchan galjona chu aneitisah taovin ahi. Hiche tobanga chu eihon jong ikhutnu hi ikithokhom uva ahileh galjona chuinei tei diu ivet jingo ahi. Mose, Aaron, Hur chuleh Joshua ho keo jong ahitapoi, min phah lou sepia ho jong chu Pakai mitmu a din athupi cheh ahitaovin ahi. Hiche galjona ponlap chu adop khom cheh diu ahitai. Winton Churchill chun, " England ten nikhat le galjona kinloupitah chu kanei diu ahi. Hichu mijousen kin (Celebration) chu Kaman soh kei diu ahi. Hiche ni chuleh golvah loupitah um ding ahi". Mi abang khat chu akisukha leh genthei thoh na umdiu ahi. Hinlah hiche ni chuleh nang ho ahoipen pen pen (Handsome & beautiful people) nahidiu ahitai. Pachan ni niloupi hiding ahi. Thuchaina: Pathen in ikhut nu domsang jing ding leh Testimony domsang jing din thahatna eipe tao hen. Khut ikithokhom tengu leh galjona najong isap khom diu ahi. Jesun keiman kajoutai. Keiman ijakai kajousotai ati. Joshua tahsan na chu galjona tahsana ahi. Tujanin hiche thannei na chun ei ho jouse chungajong na tong hen, Amen.

'Kumthah le Hinkho thah'

Text : II Cor, 5 : 17, Eccl, 3:1, Ezek, 18 : 4.



2018
KUMTHAH

Lhingjanem Haokip
Secretary, Women Dept,

Sermon

Thumakai:

Amasan muntin'a KBC Thuso sim jouse Kumthah Salaam Pakai minin kahinpeuve. Tunia iseinom u Thupi hung kitahlang 'Kumthah le Hinkhotah' kiti chungchanga lunggel khomna neithei dinga hinkho damna eipeova chuleh Kumthah galkai theija eikoipao Pa Pathen min khangvah e.

Vannoija um thil jousen kikkhel phat khat aneicheh banghin Pathen sem phat jonghin aphot phat in kikkhel na aneijin ahi. Chavanglai le nipi lai phat jong aumin, Thuhil pan thil jousen phat aneicheh e atibangin mihem in jong phat aneijin, akile thei thil le phat jong aume. Vetsah nan mihem in thil khat asem chu adeilou teng ahilou le aphot lou teng athah semphat theijin, alui jong athah bangin asempha theije, hinlah hinkho vanghi chuto-banga chu semphat thei le khel thei kit hitalou ahi. Hijeh chun leiset phat chom khat le khang khat a dinga i-hungpen naova

hi chingthei tah a hinkho man a thikon kisi h louna louna dingle thinunga tonsot gam chaan louna dinga tonsot a kikhel tih neilou hingjing Pathen bella hinkho man angaijin ahi.

I. Lhagao hinkho: II Cor, 5:17 sunga Paul in Christa a um chu akisemthah ahitan, chonsetna dalha a nungsun ahitaove. Hitabang miho dingchun thillui kiti chonset na chu bol kitta loudinga kithahsem ahitah jeh un, amaho chu athah ahitaove atin ahi.

Ahile sopi nangjong hitobang hinkho kikhel na chu nanei hitam ? Lhagao hinkhoa kikhelna tah tah, penthah na neiho, hinkho luija kon'a kikhel a hinkho thah mangho chu ahive Bible in mithah ati ho chu, amavang huhhingna kicheh tah neilou laija lung opkaina neinalai nahi vangle tunin Kumthah ahunglhun to kilhonin kigel phan, ajole hetman louvin kicheh lou pumin thina lam jonin mollem khan nate. Hiche hinkho chu mihem in apeh thei thil ahapon Pathen a kon'a bou namu ahijoi.

II. Kitahna hinkho : John 4: 23-24, sung ivet leh Pathenin Ama houdinga ahol hole adei ho chu Ama akitah bang banga hou ho bou chu ahi. Achuti leh Pathenin mi kitah ho chung a lunglhaina

aneije ti akimutheije. Kitah na hin Nampi, Gamsung, Houbung sung chule Insung asempha theije. Ps 37:25 na a Leng David in 'Kachapan apat tu ka upat geijin midih donlouva akikoi kamupon, achate khutdoa apanlam kamupo' ati hin. Midih mi kitah ho phat theina achandiu aseina ahije. Ahileh tun igam sungu ahideh a eimaho Society sung veleo hen, Jalah a 99% Christian ihitaovin, hinlah tahsan chate hin ding banga hing akitam tah loujeh in midang tahsan lou te non-christian hotoh dinmun kikhel tah sangin, amaho sangin i-khohjo taovin, mi joulhep a sumle pai nehguh ding jong ki kicha talou, khosung vengsung khantou na dinga Govt, Scheme hungho le meithai chaga ho, damlou veise aise ho a dinga Scheme ijat hung jangle alhun na ding le akiman na ding banga kimangcha talou, ithepna pen ule ibol thei pen u neocha cha a kikhel tel tella mi nung phalel keija um ding, hiche hin nam khantou na sanga khehsuh na langjoh a eipui ju ahitai. Hihjeh chun sopi ulenao ten tukum Kumthah ahung lhun to lhon a hinkho mandan ikikhel uva i-houpao Pathen deija kitah tah a hinkho mang hicheh dingin ikitem uve.

III. Phat le hinkho man them

ding: Phat manthem lou jeh in tunin igam sunguva khangthah tamtah nehpha lou nea natna phalou neiya hinkho semphat thei hitalou adim adoh in aumtan ahi. Eph, 5:16-17 sung isimle 'Tulai nikho hi aphot tahlou jeh a phat kijen petcha kichoh ding, phat manthem ding, Pakai lunglam ipi ahi het ding tin eihil un ahi. Tunin thil jouse veleu

hen phat kino dan ni nununglam ahi-dan, tilla kihe kha behseh lou Ling ki hot mat chetta, mi-hem lungthim lamang thei hinkho suse thei thil tamcheh cheh, natna jong kidang dang sohta, hitobang khanga cheng ihi-naova hin mi tam-tah Pathen a dinga pehdinga lom Pa-

then cha khat hina a pehlouva khoh som'a khat kitah tah a pe mi lhom cheh cheh, Mal 3:10 a Pakai Pathenin ase i Hopsom llingset in neipeuvin phattheina gotui sunlhah banga kasunlhah pehding nahiuve' tia ase i koiman nahsa a kinei talou mihem ama dei dei lama chon, nikho khat le penom jong le chun napeh thei louna phat jong hung um ding

ahi ti sumil pou hite.

Hijeh chun sopite, Kumthah a ihunglut utoh kilhon'a amichang cheh hinkho hihen lhangpi hinkho hijongle lhagao lam le tahsa lam dolla Pakai lunglam hi ipi ahi ihet uva i-thusei i-lasah, i-umdan, i-thilpeh dan chuleh ibol itoh jouseova hi Ama lunglhaina ahitheina dinga hinkho thah, lampi thah ijot diuvin

ikitemuve. Ahi-deh in Kumthah a hung lhun tolhon'a hinkho ihin man na diuva hin lhangpi hinkho hihen mimal hinkho hijongle chingthei tah a lim geh cha hinkho eipepa lunglhain na dinga kal isoncheh diuvin ikitemuve. Ajeh chu imasanguva

eipui mangthei thil tamtah aume ti hejing pumin, Pathen henga kipumpeh in Ama lunglhaina hinkho mangthei cheh ding in Kumthah Vangboh na toh lhinon deisah na sangpenin ikitemuve. Pathenin article sim jouse athah in lungthim thah, lunggel thah chuleh hinkho thah eipe taohen. Amen.



HOUBUNG HO CHUNGA KIPA THUSEINA:

10th December 2017 nikho jinglam Pathen houkhom na kichai jin C/Church B.Vengnom deacon board le KBC Mission Secretary convention mission natos chungchang thua kihoulimna anakinei jin kum 2018 sunga convention mission budget tongkha louva local church in mission natos nading tohgong neidin lungel anakisei khome. Hiche lunggon dungjuichun Chimphula mission field Nepal gama Houinn sahna a pan lahding kum khat sunga jotei ding tiinjong lungel lhah na ahin nei taovin ahi. Hiche Fellowship hi 2015 kuma hung kihong pana Missionary Lunminthang Haokip kisol ahin tuhin tahsancha inn 8 ahitaovin houbung mihi chapang jaona a simin mi 37 alhingtaove. Pathenin C/Church B.Vengnom phat thei boh jing taken.

KBC Centre Church New Lambulane houbung injong kum 2018 sunga mission budget tongkhalouva Arunachal mission field a houinn sahna a pan ladingin tohgong ahin neijun Houbung mite jouse chungga kipa thu akiseije, chule chutabang machun Centre Church Langol in jong pan ladin lungel ahin neiun houbung mite chungga kipa thu iseiuve. Langol houbung hin achesa kuma jong Shivaji Nagar muna houinn mun choh nadia pan analah sa ahi.

Houbung dang dangjong hitabanga hi thanom tahleh kipah taha Mission natos machal nadia pan hinla cheh din temna ahung kinei jin, tuchana pan hinlahole panladinga lungel hinnei ho jouse chungga kipa thu isei uve. Pathen in Houbung mite lolhina pejing taken.

**LOITANG LEIKINTHABI BAPTIST CHURCH IN
SILVER JUBILEE MANGTA**

Achesa 11 December 2017 (monday) nichun Loitang Leikinthabi Baptist Church in ahung kiphudoh na kum 25 lhina Silver Jubilee

loupl tahn anamang tan ahi. Hiche Fellowship hi 1992 kuma anaki-phutdoh ahin tupeta Meitei area KBC Mission field ho laha jubilee



mang masapen jong ahung hitan ahi. Hiche kina chun Rev Hen-jalen DOUNGEL Mission Secretary kin Thempun apang in hetjingna songhondoh na ananei jin ahi. Jubilee message Rev Dr Jolly Rimai Mission Secretary CBCNEI in apen chule tilkhouna le kipa thuseijin Rev Paojangam Haokip Pastor Gambih no 1 apang in ahi.

Loitang Leikinthabi houbung a hin tahsan cha member 85 vel aumin chule hiche houbung a hi Loitang Khulen, Pheidinga, chirang, Kanto sabal, turel vangma kiti khoa kon tahsan chate kipun khom ahi. Hilai houbunga hin tuhin Pastor Brojen pastor in ikoi jun ahi.

Hitabang houbung kitup tah inei u ikithangat piuvin houbung mite chung a kipa thusei uve. Pathen hin hiche houbung hi Golden jubilee jong mudin phatthei boh jing taken.

KBC EVANGELIST ***ADVENT CHRISTMAS ANAKIMANGTA***

Achesa 13 December 2017 nichun kbc office complex a Manipur a um Kuki area, Meitei Area, chule Nepali area a Evangelist ho jousen Advent Christmas anakimang khom in ahi. Hia chun Rev Henjalen



Doungel Mission Secretary thupi seijin apangin ahi. Evangelist ho jouse Mission office a kon christmas gift khat cheh akipen chule kipa chadon khomna jong akinei pin ahi. Pathen in kbc mission field chule Evangelist ho jouse phat thei boh jing taken.

TRIPURA DHALAI DISTRICT A DING MISSIONARY Khat KILA TA

Achesa 14th December nichun Dhalai District Tripura a ding Missionary ding interview anakibol in Gl Seikholen Guite C.Aisan vangkho a kon lhendoh anahitai.

Amahi Pathen gingtah houbung sungle gambih sunga mopohna analajing ahi. Pathen thujilna lama M.Div certificate nei ahin chule vahchoilasah a lunglut KBC Central Choir a jong pan anala mi ahi. Amatoth kitho khom ding agamakon Evangelist ni kilading amaho thum kithouva Tripura gama KBC mission natoh kipan ding ahitai. Tripura mission field honding tia anakisei hongthei dia iumu kipa thu sei u hitin chule mabana KBC Mission field lolhing tah khat ahung hithei nadin itaonaovah anagel doh jing u hite.

ELIJAH TAONA MOULA TAONA INN Khat THENSO HIKIT TA.

Pathen lungsetna jallin achesa nisim 20 December nichun Elijah Taona Moul Gothol a taona inn khat thenso ahikit tai. (Hiche Taona inn jaona hin Cabin 17 inei taove). Hiche inthenso na chu Rev

Ngamjapao Haokip Gen.Secretary in ananeijin ahi. Hiche taona inn hi Rev Hejalen DOUNGEL KBC Mission Secretary in angailut tah Anu le Apa Retd. Pastor Seikhopao DOUNGEL le Mrs Hatkholam DOUNGEL kichan kal kum 50 lhin hetjing na dinga a asah ahi. Kipa maicham



luina Program Chapel Halla a akimangin program kichai jin ngailut ankong sokhom na jong akinei khom in ahi. Koitabang Taona moul a Taona inn sam=nom aumleh kot hon ahijinge.

Pathen in Rev Henjalen DOUNGEL le insung mite phat thei boh jing taken.

HOUBUNG MITE CHUNGA KIPA THUSEI:

"Pakai kumsem 2017 sunga KBC houbung mite Pathen lenggam machal nadia mission natoh na a pan ihin lahnao kumle lha ahung kichai a kumthah 2018ihung lut utoh lhon in nabon chachung uvah kipa thu sangtah in kahin phonge, chule Gambih houbung hon jokhop cheh a pan ilah naova share kipe kalval a thanom tah a hin pehbe jong houbung tampi ium un amin cheh in hinpha jou tahih jong leng hiche KBC thuso mangchan nabon chachung uva kipa thu kahin phonge".

Koitabang houbung phabep vang chu neijoulou jeh leh sumlhin joulou jeh hilou vin amahoubung Mission natoh gelkhoh na jehin Convention Mission share ahinadingbanga hinpejou loujong aumthouve. Hitabang houbung hokoma avella kahin seichetnom chu Convention Mission natoh kiti hi eiho jouse kipum khat tah a natoh khomna tina ahin koima choma ahipoi tina ahi. Hijeh chun tuni chana mission natoh machal na jouse achom a convention mission lolhina hilouvin eiho jouse lolhina ahijoi. Tuban tengleh hoplen tahin Pathen natonging ting pan lange itiuleh Mission budget

hung kigong hi ina gel khoh uva akigong sanga jong tamjo cheh a pedoh dinga ina kigot diuvin Pakai minin kahin teme.

Kumsunga houbung miten kipah taha pan ihin lahnao to kisai jaPathen jalla ilolhinnao kahin phondoh nom chu

1. Missionary le Evangelist inei houjouse abonchan lhalo December chan akipedoh soh e.

2. Arunachal hostel 2012 kuma anakipan chu akichai jin Rev. Ngamjapao Haokip General secretary KBC in 25th May nichun thenso na ananei tai.

3. Gamleiset ineihou Mission mina Register bolthei chan aki-bol doh e.

4. Elijah Taona Moul Gothol Sight plan akibol doh e.

5. Tripuragama Missionary solnading survey akibol tan chule acheding Missionary jong lhen-doh ahitai.

Hitabang a mission natoh imachal jing laiun Arunachal gama imission field u va houinn umho neocha khatle hoiloutah a umjing nalai ho semphat/sahphat ahinadin Centre church phabepin tukum sunga pan hinla din kigel lhahna ahin neitaovin alungtupu houbung hon amol-so thei nadiu vin itaonao va kop jingu hite. Chule a share kalvalla missionary natoh gelkhoh na-

jalla houbung individual sponsore hinbol dinga hung kigel lha ho jouse chung a jong kipa thu isei jun ahi.

Langkhat a hitabang a houbung miten mission natoh nadia pan ilah jing laiun changval a mission natong dinga hung kipedoh houbung mijong apunbe jingin ahi. Amahon jong lhaseh leh ajokhop cheh in taona to thon sumle paijin pan ahin laovin kacholtai tilouvin tunichan in pan ahin laovin ahileh eiho jouse Pathen natoh machal na lentah khat in ahung pang peh un ahi.amaho jallin Pathen ithang vahun chule achung cheh uva kipa thu isei jun ahi.

Thase louhela panhinlajing houbung mite le changval mission sponsore hinbolho, kumchesa a Pathen phatthei na changa thanom taha pan ihin lahjing bangun tukum 2018 sungin jong pan hinla phakit uhitin achesa kumsunga itohdoh jouloulaiu tohdng a mabana kikoiho itoh doh jouna diuvin itaonao va geldoh jingu hite. Chule eimachang houbung sunga Pathen natoh keu hilouva hoplen taha tong ding le peding in Pakai minin temna ihung kinei jun ahi.

Rev.Henjalen Doungel, Secy.Mission.

Men Column

Kipa Thuphon

Earthcare Ministry New Zealand, SPTWD India leh LOM Resource Centre Men Department Kuki Baptist Convention pangkhom a Seminar, Training chuleh Demonstration neikhomna ana umin ahi.

Date 11/1/2018 nikho chun MBC Guest House Hall mun'ah Earth Care toh kisai in Honlei le theilei boldan jatchom chom kihilna ana umtan ahi. Hiche a chun Pu Rob Blakely in Class alan ahi.



Date 12/1/2018 (Friday) nin Pu Tongmang Haokip Director SPTWD chule Pu Rob Blakely le ateam ho chule LOM Resource Centre Chairman Pu Lienboi Singsit, Secretary Rev. Kaikhom Chongloi, Pu Thangtinhen DOUNGEL Vice Chairman chule Pastor phabep panna in Pate gamchom chom'a Pate lamkai phabep le Nute phabep pannan LOM Resource Centre munah Demonstration and Practical bolna Training aga kinei khom kit in ahi.

Earthcare Ministry Team ho lah a Miss Johenna Blakely hi Land scaping and Archeology Degree holder khat ahina toh Ihonin LOM Resource Centre gam letdan ho kholtohna jong anei in ipi tileh apha chom thei penna manchah thei hiding ham tiho jong nasatah in eiboipi peh uvin, ahung lhung ding phat ho a jong jochanna pan ahin lah jom jing diu ahi thu jong phondohna anei taovin ahi.

LOM Resource Centre a partnership a tohkhompi ding aban bana eipe jinguva Pa Pathen thangvahna ipeuvin, chule KBC Men Department Lom Resource Centre lolhin theina dingin Pathenin eiho khatcheh in eimang chajing uhen lang chule eipanpi jing taohen.

Hiche phatsunga boilheh jingle tomngai tah a hungpang Pate le Nute ho jouse chungu KBC Men Department chule LOM Resource Centre lamkai ho jouse thangin Pakai minin kipathu kahin phonguve.

Rev. Kaikam Chongloi
Secretary, Men Department, KBC.

47 Vei chan a KBC Women Assembly

1. December 12 - 14 sunghin KBC Centre Church Molnoi Area Gambih No, 16 mun a 47 Vei chan a KBC Women Assembly chu Delegate 162 kikhom doh in lolhing tah in achai theijin Pathen thangvah aume.

Assembly Speaker (1). Rev. D DOUNGEL, Pastor C/C Molnoi Area (2) Miss Lhingboi Kipgen Secretary Women Department, MBC ahilhonin, Thupi: 'Na gam hung lhung hen' (Mt 6:10) ahin, anikho ni chan Seminar Class kichaijin, mipi Bus thum in Langol Peak a Sight Seeing akichen, Molchunga mipin Pathen thangvah na in Christmas La akilhan lamkol akibol in, chu in, Rev. D DOUNGEL Lamkaina in Pathen henga taokhomna akineijin, phat sot hih jongle mipi kihui lha na (Recreation) le kisuh halna phat phatah akinei khomin Pathen thangvah aume.

2. Lydia Graduation Day

December 16, 2017 Saturday nikho hin KBC Centre S.Kanan Veng No.8 mun'a Lydia Graduation Day le MBC Quadrennial Conference a Choir hon



Best of Three a Prize ahin mu hou Lopna toh Choir hon Motion Album asem u thensona kin chu Rev. Ngamjapao Haokip, General Secretary, KBC Kin Thempu hinan kin thupi tah akineijin, Ankong sokhomna jong Programmme lolhing tah in akichai theijin Pa Pathen min thangvah aume.

Lydia Resource Centre Mun chungchang a kisuh thengna kinkhat akimang



KBC Nuten Lydia Plot man agam neipa Rev. Dr Hawlingam haokip to kinop tona banga kum nga sunga peh chai ding, chule aman Rs 35 Lakhs Donate abol na kipa na Song jong tunpeh ding kiti dungjujin, Pathen lungset in kumli (4yrs) sungin akiye chai theijin, pehchai ahitoh Ihon in kinchaina le Song hon doh na kin chu Rev. Ngamjapao Haokip, General Secretary, KBC Kin Thempu hinan 16th Dec, 2018 nikho in akimangtai.

Lydia Training 2018 Batch ho Screening chu nisim 15th January, 2018



Monday nikhon Lydia mun'a Prescilla Gauhaty te thalhengin Miss Lhingboi Kipgen, Women Secretary, MBC ahungin Pathen lungset in mi for photo 10 kila ding lah Gambih ho konin mi 8 ahung Ihungun, mini hin ahinlap jep Ihon lou jeh in ahung chengse chu phatah in Screening Programme chu achelhan Pathen thangvah aume.

Lhingjanem Haokip, Secretary, Women Dept,

EDUCATION BOARD COLUMN

Dr COLVIN ACADEMY MOREH NIKHO A DIA

TEMNA LE HETSAH

Pakaija ngailut Houbung mite, chule Alenggam'a tohkhompi Houbung lamkaiho le worker jouse minthengpen I Pakai Leng Jesu min in kumthah Salam kahinpeuve. Hiche KBC Thuso hi mangcha'n nahenguva temna le hetsahnom thu thangkouna kahinpeuve;

Ajeh chu ahunglung ding February 4, 2018 nikho hi Events Calendar dungjujin Dr Colvin Academy, Moreh a dinga Taona leh thilpeh/Of-fering nikho ahin, tukum hin akhoh dungjujin School mun akichontan ahileh sum chena ding alenl'heh jengin ahi. KBC School khatsun ineiju hi semphatna le chehoina dingin panhuna ngai-chatna lentah akineitan, aphatcha a tohgon ho achel'ah theina din kumdang'a sanga igelkhoh chehuva nasatah a pan hinla chehdingin Pakai minin kahintemve. Khohsahna nei tahpum'a ito doh jat u chu tamhen lhomjong leh agangthei lam a Office lam'a ihinthah chehdiuvin jong ngehna lentah kahinneijuve.

Kakipah e. Pan hinla jouse Pathen in bulhingset in phatthei naboh cheh uhen.

Pakailenggam'anatohkhompiu;

Rev Onthang Haokip, Secy. Edn Board (KBC)

KBC WORKERS PRE - CHRISTMAS ANAKIMANGTA



Achesa 12th December 2017 nikho 10:30 am in C/Church New Lambulane houinn a KBC workers Pre- Christmas kipah le thanom tah in anakimang tan ahi. Hiche kiman khomna a chun Rev D.Doungel Pastor C/Church Molnoi Area thupi seijin apang in Christmas a Jesu pen hi Pathen tohgon ahiti sapphongna kicheh tah in anei jin ahi. Worker jouse kipa thilpeh kipeh to na akinei khom in phat jouse kichai jin kipana Christmas Ankong sokhom na jong akinei khom in ahi. Hitabang a worker jouse kipa khomna nikho kinit na a pa-neihin lahpeh u Centre Church New Lambulane houbung le lamkai ho chung a jong kipa thu akisei je. Pathen in KBC phatthei boh jing taken.

KBC NO.17 REPORT



GAMPAL BAPTIST CHURCH,

Pathen jal in achesa Dt.24-2th chule Dt.01-02/1/2018 Merry Christmas & Happy New Year Gampal Baptist Church, KBC No.17 in loupitah in Naosen pen le Kumthah phatechan Pastor T. Thangkhomang Haokip Speaker hinna lolhingtah in akimangin Tuilut na jong akimangin mi nga (5) in jong anei taove.

Pu Letkholun Haokip, Hb. Secretary, Lakhan B/Church.

Dt. 4-8th Channa Lakhan Baptist Church An-ngol taokhomna kin Gambih Pastor T.Thangkhomang Haokip le Houbung mipin lolhingtah in achesa nisim 3/12/2017 nin akineitai.

Ngamkholen Haokip, Hb.Secretary.

Kultuh B/Church, KBC No.17.



Pathen panpina jal in Kultuh Baptist Church KBC No.17 nikhon achesa Dt.29/11/2017 nin "Guest House" mun le jang Thensona Gambih Pastor T. Thangkhomang Haokip in aneitai. Chule hiche Guest House kisa hi amachal jing lai tah ahi.

Pu Thangkhohao Haokip, Hb.Secretary, Kultuh B/Ch.

Pihang Baptist Church, KBC No.17



Pathen lungset le phattheina jeh in Kumlung keija, Gono, mei noi ja louna kitong aga lolhingtah a lokhom ahi thei toh lhonin Pihang B/Church KBC No.17 in achesa Dt.10/12/2017 nin loupi tah in "Lholhun Kut" Pastor T. Thangkhomang Haokip Speaker hinan akimangtai.

Pu Letkam Haokip, Hb. Secretary, Pihang B/Church.

KBC Gambih 2 Annual Assembly



36 channa KBC Gambih 2 Annual Assembly Thingjang Baptist Church mun a Pathen lungset na jallin hoitah in Date 11th-13 Jan. 2018 ana kinei chai tai.

CHRISTMAS 2017 & NEW YEAR 2018

KIPAH TAHA ANAKIMANGTA.

Kumdang lhadang bangin tukum injong KBC Houbung jousen Christmas 2017 le New Year 2018 kipah le thanom tah in anamang tan ahi. Muntin houbung jouse Guest speaker kouthei chanin akikou vin Pakai pen lopna aloupi nathei pen le anop nathei penin amang cheh un ahi. Office lama konin jong Secretary ho speaker din houbung chomcheh a akichen Gambih pastor ho le Centre Church Pastor ho jong houbung mithengte toh kipah thanom tahin houbung chomcheh a akikimang chan ahi. Pathenin eipui kitun tin kum 2018 Christmas jong damle kipah in eimusah cheh taohen.

47th Women Assembly 2017



Agape Monolite song hondohna Lydia Resource Centre mun a Rev. Ngamjapao Haokip, General Secretary in ana neitai



Men Department noija Lom Resource Centre mun a Earthcare Ministry New Zealand SPTWD India toh Demonstration anakineikhom na

Post Regd. MNP/81
Regd No. 18134/88

KBC Gamsung a Kumthah nikho a lemna ankong kipahthah in munjouse a akinei in ahi.



*Kumthah
2018
Chibai*

If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173